

# Schnitzelbank 2019 | Turnverein Wollerau-Bäch

[www.stvwb.ch](http://www.stvwb.ch)

Es Bildigscenter choschtet drissig Millione,  
en neuu MGH das würd sich au no lohne,  
es Altersheim für d'Seniore das bruchts mässig,  
defür es Rieserad am Rossberg wär no lässig!

De Knie und Tierschutz striitet wieder mal ufs Neue,  
Schluss und fertig Endi Johr mit de Seeleue,  
chönnt doch de Xhaka un de Shaq statt zäme bäte,  
mit ihrer Doppeladler-Nummer ufträte!

De Kaspar Michel sötti halt chli meh studiere,  
wenn er im Ständerat mal wett politisiere,  
dene Sexismusfalle mues er doch uswiche,  
drum tüends Kantonsrats-Sitzige fascht alli striiche!

Im Wohnquartier es Rotlicht-Millieu mit Zimmer,  
Erotik führt zu meh Verkehr es würd nur schlimmer,  
doch nur in Wollerau do glaubt me z'phantasiere,  
dass de Verkehr mit Rotsignal chöngsch kontrolliere!

Im Erlemoos bis Bönis tued sich alles wandle,  
was so passiert, das chasch als Bürger nöd verhandle,  
d'Mühli isch weg, de Böni cha eus nöd erprässe,  
jetzt gönd mir halt i d'Pyramie neu go frässe!

In Wollerau im lsfeld obe umerutsche,  
das Stüürgeld söll am Bürger nur so useflutsche,  
anderi händ au vorher scho de Brate grochä,  
im Minigolfloch chasch de Pulver au verlochä!

In Züri tüend mir scho de Kanton Schwyz apriise,  
mit Tafele uf Sehenswürdigkeite wiise,  
die Tafele sind d'Zürcher i de Nacht go gschände,  
mir händ nur knapp en Zürikrieg chönne abwände!

En huufe Plastik i de Meer und d'Tier tüends frässe,  
i vilne Fisch händs Mikroplastikrückständ gmässe,  
isch das so schlimm? Die Frag die tüend mir eus getraue,  
s'hät ja au Silikon im Buse vo de Fraue!

En Shutdown i de Staate alles tuet sich stau,  
de Trump wott Gäld ha für so tüuri Mure z'baue,  
sertig Problem hätttsch i de Schwiiz schnell überwunde,  
will euse Murer het no 3 Milliarde gfunde!

In Frankriich protestierets mer wott chum draa danke,  
mit gelbe Weste sind's für ihri Rächt am kämpfe,  
und au bi eus chunnts gli zu sertige Proteschte,  
aagführt vom Feusi Nörbi in orangescher Weste!

Mim Meyerhans wänd's Rueh i die Verwaltig bringe,  
Grund gnueg für eus en chlini Strophe drüber z'singe,  
will euse Theo isch ganz sicher es hells Köppli,  
doch ruhig isch er nur mit villne Baldrian Tröpfli!

De Maudet Pierre git sich wie im Speck en Made,  
denn Scheiche tüend uf Abu Dhabi ihn ilade,  
mir Turner wänd eus au mit Formel 1 befasse,  
drum rüered doch die grosse Nötli jetzt i d'Kasse!

Scanne den QR Code  
um die Bilder auf dein  
Handy zu sehen!

